

DOMENIE XXIX «VIE PAL AN»

Jutoris pe Liturgjie

Domenie, ai 18 di Otubar dal 2020

*Alore Gjesù ur vierzè la ment par lâ a font des **Scripturis** (Lc. 24, 45)*

Vite – Bibie – Popul

*Par “**Lectio divina - Leture divine de Bibie**” si intint une amicizie cul Signôr li che une persone si svicine a la Bibie te preiere; la leture e sarà semplice ma fate te fiduciose invocazion al Spirtu Sant che al darà la sô lûs: in chê lûs o savarìn fâ miôr lis sieltis de nestre zornade.*

*La “**Lectio divina - Leture divine de Bibie**” e je duncje une leture de Bibie preant. E je il mût di svicinâsi a la peraule di Diu dai apuestui, des comunitâts cristianis di Gjerusalem, di Antiochie, di Efeso...*

In chê peraule meditate e preade, te invocazion e don dal Spirtu Sant, i prins cristians a nudrivin la lôr fede, ur vignive dade sperance, a vivevin tun amôr di condivision che nol è di chest mont.

*O podìn dî che la “**Lectio divina - Leture de Bibie te preiere**” e je antighe tant che la Glesie e e continue tai secui come un riul simpri nutrît de risultive.*

No si tratave di une leture organizade cun metodis particolârs; al jere un mût par meti su la stesse lungjece di onde vite e Bibie o, se si vûl, Bibie e vite.

Come che al dîs il salm 119, 105:

***E je un ferâl pal gno pît la tô peraule,
une lum pal gno troi.***

Al è ce che une persone e varès di fâ vuê te semplicitât da l’anime e in fiducie tal Signôr, ancje se si sint impreparate.

Cfr. dal libri di Carlos Mesters: Far ardere il cuore - Ed. Messaggero Padova, p. 5.

* * *

Il principi dal Vanzeli di vuê - Dait a Cesar ce ch’al è di Cesar e a Diu ce ch’al è di Diu - al è sacrosant, dome che la sô aplicazion tai secui e je stade une “borderline” fra teorie e pratiche un zig-zag di concordâts, di interès e di compromès che a àn puartât a lis glesiis plui dam che ben.

Di fat la tentazion dal miscliç e dal pastiç e je grande e si cîr simpri di cumbinâ e di ecuivocâ midiant des segreteriis di stât e de diplomazie, ancje se il Signôr al à dit che no si pò e no si devi.

Di fat: Nissun nol pò servî a doi parons; parcè che o al odearà un e i volarà ben a di chel altri, o si tacarà a un e al trascurarà chel altri. No podês servî a Diu e a mamone (cf. Mt 6, 24).

I risultâts negatîfs dal miscliç a son orepresint sot i vôi di ducj.

Come che simpri al bateve pre Checo: la glesie e à di vê un unic concordât, chel fat cui puars.

Il Cesar, l’imperadôr, l’idul di chest mont e di vuê al à nons specifjics: idolatrie dal profit, adorazion dai bêçs, marcjât libar, economie globâl, globalizazion de culture, supremazie de

tecniche, distruzion des minorancis e dai debui cun consequencis disastrosis. Chest lu dimostre ancje pape Francesc in tancj discors e te sô ultime encicliche Fratelli tutti (Assisi, 3 di Otubar).

Chest tal grant; ma tal nestri piçul il concordât dal 1929 e la politiche de gjerarchie catolice cu la Democrazie cristiane dopo de seconde vuere mondiâl a àn continuât a distruzi la nestre identitât furlane slovene e todescjie, il nestri popul; a àn cjolt originalitât-vitalitât a chês glesie di plui lenghis che come il dì des Pentecostis a Gjerusalem, e vîf culi in Friûl.

-Dait a Cesar... dait a Diu- a son i discors di pre Bepo Marchet, continuâts di pre Checo Placerean, atualizâts di pre Antoni Beline e di predis di frontiere in Benecjie e Val cjanâl, intervents mirâts e costants tal timp; epûr tal concret nuie al è miliorât, che anzit la situazion e sta pegjorant.

Antifone di jentrade

Sal 16,6.8

Jo ti clami, Diu gno, ma tu rispuindimi.
O soi sigûr che viers di me tu slungjis lis tôs orelis.
Vuardimi, Signôr, come la lûs dal voli,
platimi te ombre des tôs alis.

Colete

Diu onipotent e eterni,
danus une volontât che si plei simpri denant di te
e di servî a la tô maiestât cu la scletece dal nestri cûr.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Is 45,1.4-6

O ai cjapât **Ciro pe gjestre, par sdrumâ denant di lui i forescj.**

*Ai tims dal profete, o sin tal secul VI p.d.C., paron dal mont al jere **Ciro re di Persie**. In chest an dal 2020 al à la altissime prerogative di sovran spotic dal mont il Coronavirus. Di fat ducj nô si sintin siei sudits spaventâts e sclâfs.*

*La Bibie nus dîs che Diu si servì di **Ciro pe liberazion dai Ebreus de sclavitût in Babilonie**; nol è che vuê si servissi dal Covid-19 pe liberazion dai idui modernis che o adorin e che a stan malant e copant ecosistemis e tiere? Parcè che ni i **Ciro dai secui**, ni i **potents de tiere di vuê a son alc**: Jo o, soi il Signôr e no 'nd è altris; / denant di me nol è nissun diu!*

E al dîs S. Pauli: Diu al à sielzût ce che tal mont nol à nissun valôr e ce che al è sbeleât e ce che nol è nuie par disfâ lis robis che a son (I Cor 1, 28).

Dal libri dal profete Isaie

Cussi i dîs il Signôr al so onzût,
a **Ciro**, che lu à cjapât pe gjestre,
par sdrumâ denant di lui i forescj
e par dispeâ i cinturons dai ombui dai rês,
par spalancâ denant di lui lis artis
e par che lis puartis no restin sieradis.
«Par amôr dal gno servidôr **Jacop**,
e di **Israel**, gno elet,
ti ai clamât par non,
ti ai dât un titul cuant che tu no tu mi cognossevis.
Jo o soi il Signôr, no 'nd è altris;

denant di me nol è nissun diu!
Ti ai peât cuant che tu no tu mi cognossevis,
par ch'a sepin dal jevâ al lâ a mont dal soreli
che denant di me al è il nuie;
jo o soi il Signôr e no 'nd è altris».
Peraule di Diu.

SALM RESPONSORIÂL

dal Salm 95

Disêt framieç dai popui: «Il Signôr al regne!».

Al regne midiant di Gjesù di Nazaret, de perauale di vite dal Mestri, di Crist muart par nô e risurît.

La societât di vuê e pense di podê fâ civiltât dome cul Dait a Cesar ce ch'al è di Cesar, cence olme di Diu; ma al è ancje scrit: Ve': la vuestre cjase us sarà lassade deserte e al è ce che al sta sucedint. Di fat us dîs: di cumò indenant no mi viodareis fin cuantche no disareis: Benedet chel che al ven tal non dal Signôr (cf. Mt 23, 38).

Peraulis che a fasin rifleti; di fat i dius dai popui a son un nuie, / impen che il Signôr al à fat i cîi.

Al è vêr: Cjantait al Signôr une cjante gnove...

R. A ti, Signôr, la potence e la glorie.

Se cjantât: Il cjant dai salms responsoriâi, p. 79.

Cjantait al Signôr une cjante gnove,

cjantait al Signôr di dute la tiere.

A ducj i forescj contait de sô glorie,

framieç di ducj i popui i siei spetacui. **R.**

Parcè che al è grant il Signôr e al merte laudât,
tremet sore ducj i dius.

Di fat i dius dai popui a son un nuie,

impen che il Signôr al à fat i cîi. **R.**

Dait al Signôr, fameis dai popui,

dait al Signôr glorie e potence,

dait al Signôr la glorie che al so non i spiete;

cjapait sù ufiertis e jentrait tai siei andits. **R.**

Ch'e trimi denant di lui dute la tiere.

Disêt framieç dai popui:

«Il Signôr al regne!».

Al ten sù il mont par no ch'al clopi,

al judiche i popui cun justizie. **R.**

SECONDE LETURE

1 Ts 1,1-5

O vin presint la vuestre fede, l'amôr e la sperance.

Il nestri vanzeli no us è stât predicjât dome a peraulis ma ancje cun efusion dal Spirtu Sant.

Al è ancje par chest, che o vin di stâ dongje a chê perauale meditate e preade de Bibie, te invocazion dal Spirtu Sant. Come che o disevin: i prins cristians in chel Spirt a nudravin la lôr fede, ur vignive dade sperance, a vivevin tun amôr di condvision che nol è di chest mont.

De prime letare di san Pauli apuestul ai Tessalonicês

Pauli, Silvan e Timoteo a la glesie de int di Tessaloniche, in Diu Pari e tal Signôr Gjesù Crist: grazie a vualtris e pâs!

O ringraziin simpri Diu par ducj vualtris, ricuardantjus tes nestris preieris, vint presint di un continuo denant di Diu e nestri Pari la operositât de vuestre fede, il sfadiâ dal vuestri amôr, la fermece de vuestre sperance tal Signôr nestri Gjesù Crist. O cognossin, fradis benvolûts di Diu, la vuestre clamade, parcè che il nestri vanzeli no us è stât predicjât dome a peraulis ma ancje cun fuarce, cun efusion dal Spirtu Sant e cun plene convinzion. Peraule di Diu.

CJANT AL VANZELI

Fil 2,15-16

R. Aleluia, aleluia.

Lusît tal mont come stelis,
tignint alte la perauale di vite.

R. Aleluia.

VANZELI

Mt 22,15-21

Dait a Cesar ce ch'al è di Cesar e a Diu ce ch'al è di Diu.

Di cui ese la muse cu la iscrizion? Di Cesar!; *ma pal cristian il Cesar, la uniche imagine di Diu al è Crist. O podaressin incurnisâ chest vanzeli tes peraulis di S. Pauli ai Colossês: Lui al è il litrat dal Diu invisibil, / il Fi primarûl di dute la creazion (Co 1, 15); e ancje, tal vanzeli di Zuan: Filip, chel che al à viodût me al à viodût il Pari (14, 9).*

Pal cristian la uniche iscrizion e monede che e vâl e je il cartel picjât parsore de crôs: Gjesù il Nazaren il re dai gjudeos (Zn 19, 19).

Imagine dal Pari e je ancje la nestre persone. Di fat: Diu al disè: Fasin l'om sul nestri stamp, che nus semei (Gjen 1, 26). Devant di chestis rivelacions, ducj i famôs presidents dal mont a siruchin, si strucjin e a colin. Ubidin a S. Pauli: Dait a ducj ce che a àn dirit di vê: la tasse a di chel che al à dirit a la tasse, il rispjet a di chel che al à dirit al rispjet, l'onôr a di chel che al à dirit al onôr (Rm 13, 7); savint però: O sês stâts comprâts paiant il presit; cirî di no diventâ sotans dai oms (1 Cor 7, 23).ass

Dal vanzeli seont Matieu

In chê volte, i fariseos, sintût che Gjesù al veve fat tasê i saduceos a faserin consei par cjapâlu in fal tai siei discors. A mandarin duncje di lui i lôr dissepui, insieme cui erodians, par dî: «Mestri, o savin che tu sês sancîr e che tu insegnis la strade di Diu cun veretât e che no tu âs sudizion di nissun; di fat no tu cjalis in muse nissun. Dîsinus alore ce che tu pensis: Esal permetût o no di paiâi la tasse a Cesar?». Gjesù, cognossint la lôr falsetât, ur disè: «Parcè volêso tentâmi, fals? Mostraitmi la monede de tasse». E i presentarin un denâr. Ur disè: «Di cui ese la muse cu la iscrizion?». I rispuidin: «Di Cesar». E lui a lôr: «Dait duncje a Cesar ce ch'al è di Cesar e a Diu ce ch'al è di Diu».

Peraule dal Signôr.

Su lis ufiertis

Danus, Signôr, ti prein,
di cirî cun cûr libar i tiei regâi,
par che, purificâts de tô grazie,
o vignin smondeâts propit cui misteris che ti servin.
Par Crist nestri Signôr.

Antifone a la comunion

Sal 32,18-19

Il voli dal Signôr si poe sun chei che lu rispjetin,
sun chei che tal so boncûr a sperin,
par sfrancjâ de muart lis lôr vitis,

par tignîju in vite in timp di miserie.

O ben: Mc 10,45

Il Fi dal om al è vignût par dâ la sô vite
in riscat par tancj di lôr.

Daspò de comunion

Il contat cu lis robis dal cîl
che nus zovi, Signôr,
par vê i tiei benefizis in cheste vite
e par jessi inluminâts su lis realtâts eternis.
Par Crist nestri Signôr.

* * *

Sante messe e Eucaristie, rîts, preieris, cjants: Hosanna pp. 34 - 119.

* * *

Covid-19: Una tragedia globale

Papa Francesco, Lettera enciclica

Fratelli tutti - sulla fraternità e l'amicizia sociale

Assisi 3 ottobre 2020.

32. Una tragedia globale come la pandemia del Covid-19 ha effettivamente suscitato per un certo tempo la consapevolezza di essere una comunità mondiale che naviga sulla stessa barca, dove il male di uno va a danno di tutti. Ci siamo ricordati che nessuno si salva da solo, che ci si può salvare unicamente insieme. Per questo ho detto che «la tempesta smaschera la nostra vulnerabilità e lascia scoperte quelle false e superflue sicurezze con cui abbiamo costruito le nostre agende, i nostri progetti, le nostre abitudini e priorità. [...] Con la tempesta, è caduto il trucco di quegli stereotipi con cui mascheravamo i nostri "ego" sempre preoccupati della propria immagine; ed è rimasta scoperta, ancora una volta, quella (benedetta) appartenenza comune alla quale non possiamo sottrarci: l'appartenenza come fratelli».

33. Il mondo avanzava implacabilmente verso un'economia che, utilizzando i progressi tecnologici, cercava di ridurre i "costi umani", e qualcuno pretendeva di farci credere che bastava la libertà di mercato perché tutto si potesse considerare sicuro. Ma il colpo duro e inaspettato di questa pandemia fuori controllo ha obbligato per forza a pensare agli esseri umani, a tutti, più che al beneficio di alcuni. Oggi possiamo riconoscere che «ci siamo nutriti con sogni di splendore e grandezza e abbiamo finito per mangiare distrazione, chiusura e solitudine; ci siamo ingozzati di connessioni e abbiamo perso il gusto della fraternità. Abbiamo cercato il risultato rapido e sicuro e ci troviamo oppressi dall'impazienza e dall'ansia. Prigionieri della virtualità, abbiamo perso il gusto e il sapore della realtà». Il dolore, l'incertezza, il timore e la consapevolezza dei propri limiti che la pandemia ha suscitato, fanno risuonare l'appello a ripensare i nostri stili di vita, le nostre relazioni, l'organizzazione delle nostre società e soprattutto il senso della nostra esistenza.

34. Se tutto è connesso, è difficile pensare che questo disastro mondiale non sia in rapporto con il nostro modo di porci rispetto alla realtà, pretendendo di essere padroni assoluti della propria vita e di tutto ciò che esiste. Non voglio dire che si tratta di una sorta di castigo divino. E neppure basterebbe affermare che il danno causato alla natura alla fine chiede il conto dei nostri soprusi. È la realtà stessa che geme e si ribella.

35. Velocemente però dimentichiamo le lezioni della storia, «maestra di vita». Passata la crisi sanitaria, la peggiore reazione sarebbe quella di cadere ancora di più in un febbrile consumismo e in nuove forme di auto-protezione egoistica. Voglia il Cielo che alla fine non ci siano più "gli altri", ma solo un "noi". Che non sia stato l'ennesimo grave evento storico da cui non siamo stati capaci di imparare. Che non ci dimentichiamo degli anziani morti per mancanza di respiratori, in parte come effetto di sistemi sanitari smantellati anno dopo anno. Che un così grande dolore non sia inutile, che facciamo un salto verso un nuovo modo di vivere e scopriamo una volta per tutte che abbiamo bisogno e siamo debitori gli uni degli altri, affinché l'umanità rinasca con tutti i volti, tutte le mani e tutte le voci, al di là delle frontiere che abbiamo creato.

* * *

- * *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- * *Il cjant dai salms resposoriâi, Ed. Glesie Furlane, 2012.*
- * *50 corâi de cristianitât todescje voltâts par furlan, ed. Glesie Furlane, 2016.*
- * *Par domandâ chescj libris scrivêt a info@glesiefurlane.org*